

Kayëta iýanar Piyer in Lilaya in

Akayëta aŋo ro Piyer ýëgwën babi okërecen od şapër bax gër Owun or Rom ok. Arixëra banëbi rixërand do bani sorond mbaŋ gayik aŋa ŵa këni end Yesu Kërisët eŋ. Piyer ga wël baxo end toro indebën eŋ, xwitanaxën babi mëne Kaxanu mbaŋ ye ko do aŋap ýapëk eni bayi ga xwëta këno. Afel fel babi bëte Kaxanu sana këbi eni gi bulunda ir bër fexën këbi Kërisët. Are re baxo bëte eni kemëna eni gi bela bër këŋo riyeinënd Kërisët, gayikako Angoc and Kaxanu aŋ gër ola orebën hi ko. Er ex gër akayëta in:

Ecëmar el: 1.1, 2.

End eyar ed apexa el, do gë owënëk eŋ: 1.3-2.3.

End bulunda ir Kaxanu, end olëngw do gë ebuŋan ed gër toro eŋ: 2.4-25.

End eñër do gë ebalër gër aminëmëra eŋ: 3.1-22.

End toro ir ang Yesu Kërisët eŋ do gë end oyekax eŋ: 4.1-19.

Epëb ed bëlëngw bër gër amara el do gë eperëna el: 5.1-11.

Epelar el do gë ekaran ed benjekax el: 5.12-14.

Ecëmar el

¹ Wëno Piyer, parëxanda ir Yesu Kërisët in këŋun ýëgwënëlinde wën bër sana këŋun do

ŝapër kën gër owar or Poŋ, gë Galasi, gë Kapados, gë Asi do gë Bitini bën. ² Faba Kaxanu kë nangënd beÿ bën dek damana ex gixën. Gë enang elo yata këŋun gë epit ed fit këŋun gë Angoc andexëm el, en tēfaxënënd endexëm eŋ do eŋun wunētaxën gë oŝat or Yesu Kërisēt oŋ. Awa cēnarēlex de oyekax ol do gë obetak ol gër ola orewën!

End eyar ed apexa eŋ

³ Cēkwaneŋone Kaxanu, Sēm ir Axwën arebi, Yesu Kërisēt. Gë axaÿēnan isēm irexëm in rēw këbo gaŝēxe paß gë ekani ed Yesu Kërisēt gër ecēs el ene cotaxēne eyar ed gë aniyān el. ⁴ Mondako ri ko ene cotaxēne er dīn ax cēsēnd na in, er bēya këbo in, er dīn ax buyarēnd na in, er dīn ax nēngwēta na in. Kaxanu ejo fenin këŋun yaŋ gër orēn. ⁵ Wēn këŋun nēkonand gë panga ind Kaxanu iŋ, gë ekwēta ed xwēta këŋo el en cotaxēn apexa and kë ŝanayaw gër bakey bapelatar aŋ.

⁶ Ata wēn mbaŋ këŋun nēngandērand ado ga ŷapēk en caminara imēd nē end batēy bandanjēm band hi këŋun gērēgako baŋ. ⁷ Batēy baŋo kë wāsinēnd oxēbēn or ekwēta edewēn ol. Mēŋ xēbēnēk nēmēc kaŋe ir wēnēnēk xodux do kë nemind fo. Ado ga hi baŋun batēy baŋo, mondako bax ex gi eŋata ed ekwēta edewēn el gë ecēkw, gë enjaran, do gë epēß, and ko ŝanayaw Yesu Kërisēt aŋ. ⁸ Wēn aŋan ŧan këno, ado bayik elod ano wat ex na. Gērēgako dēŋ axwēta xwēta këno ado bayik ano watēnd na, do aŝot ŝot kën onēnga or gë

enjaran, or ala dëŋ ax kor na exo tēfēt. ⁹ Ašot šot kën apexa and enjēw, and ex acosa and ekwēta edewēn aŋ.

¹⁰ Ata apexa aŋo bani šaland gē obal osēm eni nang bēlawēnel bër bax reyarand end oyekax or fenin kēŋun Kaxanu eŋ. ¹¹ Mokemēna bani xemēnand eni nang nand feye do bēnd fe fēnēta ko Angoc and Kērisēt and ebax gēr ola orebēn aŋ. Yama Angoc aŋo ga babi nangēnēnd nde gana-gana fo toro ind Kērisēt in do enjaran end ebax exo cot eŋ and ko fis aŋ. ¹² Kaxanu anangēn nangēn babi mēne wēn xwēnēk eyeyan ed lawēnēgu babi eni deyara el, ax gi bana ed faβ babi bēn bēlawēnel. Bēfemēra bër Atēfētan bēn awēlaw fo wēlaw bani bēbēr kēnun sēfētanēnd gērēgako gē panga ind Angoc Amēnēk and xaniwēk gēr orēn in. Gēr beŋo kēbi xacērand eni yēkwa omeleka ak ga ŋandi kēbi eni nangēdo.

End oŵēnēk eŋ

¹³ Awa yēlarayindēn aye, giyin gē anjus, kwētīn dek eyar edewēn el gēr oyekax or kēŋun wēlanēgu Yesu Kērisēt and ko šanayaw aŋ. ¹⁴ Ang obaš or kēŋo baxētēnēnd fo, kēreŋun balēnd na end oŋandi od šot ban gēr onangērarēxe orewēn eŋ. ¹⁵ Barikan ang wēn ko ar sana kēŋun ak, wēn bēte mēnin mondako fo gēr bēnd kēn rind yo. ¹⁶ Gayikako aŷēgw ŷēgw kēni: «Bēwēnēk kēn hi gayik wēno awēnēk hi kēme✧.»

✧ **1:16** 1.16 Andolewit 19.2

17 Do angëmëne axëla këno xëland Kaxanu ang Sorix irewën fo, xarak mëñ këbi xitind bela bën gë epitëndër këm, ala kala gë bebër ri ko bën, diyayindën gë anjiy and Kaxanu nand hi kën gër yeba na. 18 Enimin, anang nang kën mëne Kaxanu anun dacët ex na gë bebër kë nemind: gë kodî ba gë kaçe. Gër ola or gë ofëcak këm, or rëweli kënun bëxarëk bërewën racët këñun. 19 Barikan gë oşat oxëbëanaxik or Kërisët or racët këñun oñ, oşat or şarëk ang or ifey iwënëk do ibëngwëk, and şadaxa këno fo oñ. 20 Mëñ ex ar sana këño Kaxanu gana-gana fo, đamana exo dixën ngwën an. Do mëñ şanayaw ko gër bakey bapelatar baño në endewën na, 21 wën bër xwëta këno Kaxanu paß gë mëñ bën. Kaxanu xanin këño gër ecës do yël këño enjaran eñ. Mondako bax, ex gixën ekwëta edewën el do gë eyar edewën el gër Kaxanu.

22 Gayikako aŵënënaya wënaya kën ga ŵa kën đal in, en cotaxën aminëmëra and gë eñëñëxax end şonayak këm añ. Awa balëringdëleñun mbañ andewën rewën añ, gë anjëlan ak đek do gë emëkw epeşax. 23 Enimin, bër rëw këbi Kaxanu gaşëxe hi kën, xarak ax gi ex na đe gë eneđa end kë şësënd, bari gë eneđa end ax cësënd na, gë eyeyan ed din ir din ed gë aniyand and Kaxanu el.

24 Gayikwa ala ar kë liyand yo,
ang andës fo hi ko,
đek enjaran endexëm eñ, ang opëtëfët fo ex.
Andës añ añañ kë ñaỹënd
do opëtëfët ok aŵini kë wïnind✧.

✧ 1:24 1.24 Esayi 40.9

25 Barikan eyeyan ed Axwën el, din ir din kë bayind.

Eyeyan elo ex Atëfëtan and nangën kënun aņ.

2

End cale ingaşax eņ

¹ Awa tebin oxeỹ or ex yo, osit or ex yo, egi ed bëyëñenax bër kë labayand el, oyëkëraxi ol do gë odena od ex yo. ² Ñandiyindëleņun ang omër omënëk fo eyeyan ed Kaxanu el ang këbi ýandind omër bëndoyer ak, en pirixën gër apexa, ³ gayikako anang dëņ nang kën ang nënga ko Axwën ak.

⁴ Tëkayino ar ex ekaỹ ebëngw ed lap bani bela an. Xarak, mëņ ex ed yata ko Kaxanu el, ed xëbënan këņo el. ⁵ Ang këni barënd oxaỹ ex gi aciw̃ ak, wën bëte barërin ang oxaỹ obëngw fo, en gixën Aciw̃ amënëk, bëşadaxan bëwënëk, eno dinaxënënd Kaxanu, paş gë Yesu Kërisët, ocađaxa od onden, od ko ýana exo ŋanënd.

⁶ Gayikwa are rek gër Oñëgw Omënëk:

«Watin ga këme xwëtënd gër Siyoņ ekaỹ ekëla, elo sana këme, elo xëbënan ke.

Do ar kë w̃a endexëm an, din aņo cëfënan na[✧].»

⁷ Awa ekaỹ elo këņun yëlënd epëb el, wën bër xwëta këņo bën. Barikan gër bër aņo kwëta ex na:

«Ekaỹ elo ex ed lap bani bëbay el xarak mëņ ex ekëla el[✧].»

⁸ Do bëte:

✧ 2:6 2.6 Esayi 28.16 ✧ 2:7 2.7 Calemoñëw̃ 118.22

«Ekaÿ elo këni fokërend bela bën,
ekaÿ elo këbi rebënd✧.»

Ga xey këbi eni tēf eyeyan ed Kaxanu el, bëte
gayik mondako bax ebi gi.

⁹ Barikan wën cēŋ, er hi kën andëwëra and
sana ko Kaxanu, bër gë oşadaxan or emun,
enëng emënək, bulunda ir xwën ko. Mondako
hik en tēfëtëraxënënd becërëcaxik bënd ri ko ar
nëcëtëgu këŋun gër ecamëfan do wëla këŋun
gër angoben akëbënaxik andexëm an. ¹⁰ Wën
anëka hi kën gërëgako bulunda ir Kaxanu, xarak
akarëk aŋ, an gi bana bulunda. Kaxanu abaŋo
xaÿënan na endewën eŋ. Barikan gërëgako
axaÿënan këŋo xaÿënanënd.

¹¹ Wën bëmaÿe bënd ke balënd mbaŋ
bëŋo, axara xara këmun gayikako bër oku-
can, do bëliyer fo hi kën, kemënayin en
kwëÿëta oñandi od eman od kë wërelind enjëw
ok. ¹² Mëlayayindën ſenene ola orewën ol
mërëxand ir bër aŋo kwëta ex na Kërisët
bën. Do gër ed kënun nangaşandërand,
watindëlexëni bandixa banjekax bandewën
baŋ, eno cëkwaxën Kaxanu yatir këbi ñatën.

End epëb ed owun eŋ

¹³ Ang ÿapëk gër Axwën ak, pëbindën olëngw
or ex yo. Pëbindëno emun eŋ, mëŋ ar ex ar
gapak an. ¹⁴ Pëbindënëbi ogofërëner ok gayik
emun eŋ fana këbi enëbi nëpënd bëwëndëran
bën do enëbi cëkwand bër kë rind benjekax
bën. ¹⁵ Enimin oñandi od Kaxanu ok ex, paŋ
gë benjekax bënd kën rind beŋ, eni cëmind

✧ 2:8 2.8 Esayi 8.14

bela bësitarak bën, bër ŷoweŷ ax nang ex na bën. ¹⁶ Diwayindën ang bërëyaya fo, bari këren dabayand na gë orëyaya olo en dixën eñëñënax eñ ado bayik ŷoweŷ anun cëba ex na: giyin okadëp od Kaxanu. ¹⁷ Pëbindënëbi bela dek, ŋanindënëbi bëmaŷe bën, yëdayindëno Kaxanu, do pëbindëno emun eñ.

End oxëreceñ eñ

¹⁸ Wën bëriyenin bër gër bëciw bën, yëdayindënëbi bëxwën bërewën bën do mayindën endebën eñ ado eni nemëri, bari ax gi ex na bër bëngwëk do nënga këni bën fo. ¹⁹ Gayikwa oyekax kën šot ga buña kën buñand en toro në end Kaxanu, gë amena këm. ²⁰ Enimin, ašëkw nde këno šëkwënd ar kë buñand gër toro në end ga wëndëra ko an? Barikan angëmëne abuña kën buñand në end ga kën rind benjekax, enjekax ex gër ogës od Kaxanu.

²¹ Në eño yataxën këñun Kaxanu gayik Kërisët, mëñ bëte, mondako soro ko në endewën na, eno tēfētelixënënd, en tēfaxënënd banjëta bandexëm bañ. ²² Bari mëñ elod axo mendëra ex na, bëte elod ala ax wël ex na enëgwëš gër etëŷ edexëm.

²³ And bano širërand añ ababi wša na, and baxo sorond añ, ala abaño wesa na. Barikan asebën sebën këño amaša añ ar kë xitind šenene an.

²⁴ Mëñ dëñ lëbinak bamena bandebi bañ gër eman endexëm and fika këno gër kërëwa do šës ko në end beñëñënax bendebi añ.

Mondako šës këne ene capëraxëne gë
beñëjënax bej,
ene diyaxënënde aniyān and šenene.
Gë tembaŷ indexëm inj kën fakaxënënd.

²⁵ Enimin, anëka hi ban ang oyel or nambërak
fo✧.

Barikan gërëgako anëka baka kën gër ar ex
axadac
do anëkona arewën.

3

End eñër eŷ

¹ Bëte wën bësoxari bën, mayindën aŷa end
bëcën bëndewën eŷ. Angëmëne mondako kën
rind, axor kënëbi xor bëcën bëndëmar ado ga
bani hëpënd end Kaxanu eŷ. Axor kënëbi xor
gë eyeyan këm, gë ola orewën ol, ² angëmëne
eni watënd gër aniyān andewën mëne aŷën wën
kën do mëne wën afëb fëb kënëbi. ³ Oñañënarān
odewën ok kërex gi na or fac: olap, gë bañepe
band kaŷe, gë bëŷwën bënd kaŷe, gë orëxër
or kaŷe do gë banjëm bakëbënaxik. ⁴ Barikan
gil ex lëf gër emëkw, oñañënarān od din ax
biŷënd na, od onden onënga, do ond angwëlëra.
Ata oñañënarān od mondako ok, mbaŷ këŷo
xëbënanënd Kaxanu. ⁵ Oye olo šot bani bësoxari
bëwënëk bër angwën bën, bër xwëta baŷo
Kaxanu bën ga banëbi fëbënd bëcën bëndebën
bëŷ. ⁶ Gako Sara, afëb fëb baŷo Abëraxam
xali baŷo ŷacënd: «Axwën aram✧.» Odënaŷ
odexëm hi kën angëmëne ari kën rind benjekax

✧ **2:25** 2.25 Esayi 53.4-6 ✧ **3:6** 3.6 Añanar 18.12

beŋ, xarak er kën yëdand gebatak aŋun yëbun ex na.

⁷ Bëte wën bëcën bëŋ, mëlayayindënëbi endëmane fo bolindaŵ borewën gër eñër edewën, ga nang kën mëne ola orebën ol ax këme na bon. Pëbindënëbi, gayikwa bën bëte ašot këni šot aniyān and ko yëlënd Kaxanu nē end oyekax orexēm aŋ. Diyindën mondako, ata bayik yoweÿ ax bedi na cale indewën iŋ.

End ebalër eŋ

⁸ Awa wën wëlëringdën, balëringdëleŋun ang bër acël amat fo, cotindën anjëlan amat, bëngwëlex onden ondegwën oŋ, banayindën.

⁹ Ax gi ex na momašën eñëŋënax eŋ gē eñëŋënax, do ocir ok gē ocir. Ecëñëxët, karanindënëbi benjekax bošandax, gayikwa nē eŋo yataxën këŋun Kaxanu en cotaxën obetak or fenin këŋun ol. ¹⁰ Enimin, Oñëgw Omënëk ok ga rek:

«Ar yāndi këŋo exo ŋan aniyān aŋ
do exo cot bakey banjekax an,
etëÿ edexēm el tebëlex odena ok,
do gē etitinaxën ed bela el.

¹¹ Kwëÿëtalexo beñëŋënax beŋ
do diyindëlexo benjekax.
Calayindëlexo aketëxeta aŋ,
do kemënayindëxelo exo ŋatën.

¹² Gayikwa bangës band Axwën baŋ anëkona
këbi nëkonand bër šenene bën,
do gē banëf bandexēm baŋ,
abaxët ko baxëtënd cale indebën iŋ.

Barikan ašus këbi šusënd bër kë rind beñëjënax bën[☆].»

¹³ Do wën nobën cëj këjun rinan eñëjënax angëmëne benjekax kën balëkënalind?

¹⁴ Ado enun toronënd në end or šenene eñ, nëngandërayindëleñun! Kërenëbi yëdand na do këreñun bëlandërand na.

¹⁵ Barikan, pëbindëno Kërisët, mëñ awënëk an, ang Axwën fo, gër owëkw orewën. Giyindën lañ bëwelëk bër eno yakand kerët ar këjun wëka yo eno pelëra ine kën yaraxënënd er kën yarënd in.

¹⁶ Barikan, yakayindën endëmane fo, do gë onden onjekax. Ata bër këjun širërand në end ola or šenene or yël këjun Kërisët bën cëfënanindëlebi gër ed ebax enun yëlan yëy.

¹⁷ Enimin, pecanëleñun en torond ga kën rind enjekax eñ angëmëne mondako yandi këjo Kaxanu, bari ax gi ex na ga wëndëra kën.

¹⁸ Gayikwa Kërisët amat fo soro ko do šës ko në end beñëjënax, mëñ ar šenene, në end bela bësëmbak, eñun mëlaxën gër Kaxanu. Eman endexëm eñ law bani, barikan Angoc Amënëk añ xaninëgu këjo abëngw.

¹⁹ Gë angoc andexëm añ ye baxo Kërisët ebi tëfëtandërax endexëm eñ bangoc band gër epëra bañ.

²⁰ Akarëk añ, bangoc baño baño wëšenënd Kaxanu. Mëñ abuñan buñan babi xali fika ko Nowe Akuluñ and fexaxën bani mëñ gë bela bëcongëbëxi polo gër men añ.

²¹ Eño ex amatinali and xobuyi or këjun fexënënd gërëgako el, bari ax dëxëtënd na abuyar ir eman in. Xobuyi olo onden onjekax

☆ 3:12 3.12 Calemoñëw 34.13-17

ex gër lëngw ir Kaxanu paß gë ekani ed Yesu Kërisët gër ecës el. ²² Mëñ ex ar bakak yañ gër orën do yëpax ko gand liw ir Kaxanu an, mëñ ex ar këno baxëtënënd omeleka an, bangoc band wunëk bañ do gë band gë panga bañ.

4

End aniyän angasax eñ

¹ Awa gayikako Kërisët asoro soro ko gër eman endexëm, wën bëte giyin bëwëlëk ang bër emer fo en torond mondako fo. Gayikwa ar sorok gër eman endexëm an, anëka şapër këni gë eñëñenax eñ, ² exo dıyaxënënd bakey band bayi këño gër ebar bañ ang këño yändind Kaxanu ak, ax gi ex na ang ex oñandi oñëñenax ak. ³ Enimin akarëk añ, gwac xwënda ban edi ed bebër ñan këni bër año kwëta ex na Kërisët bën: asëk alakirand fo in, oñandi oñëñenax ok, ekureliran el. Ata wën monjëlaya ban yëlayand gër ñambëran in, gër oşëb ol, do gër ekëla ed olaş el, xarak aşëba şëbak. ⁴ Gërëgako aşaran këbi şaranënd ga kënun watënd mëne an bo ex na ga kën xaşërënd gë bën gër eñac, mëñ kënun renaraxënënd. ⁵ Barikan bën ayaka këno yakad ar yäpëk ebi kiti bela bëbëngw do gë bëşësëk an. ⁶ Enimin, mëñ nangënaxën kënebi Atëfëtan añ bëşësëk bën dëñ eni dıyaxënënd gë Angoc and Kaxanu añ ang ak ado ga xiti kënebi ang dek bela ak.

End oyekax eñ

⁷ Ekwët ed beÿ dek el anëka saxëguk. Awa giyin bërenik do bër gë anjus, en kemënaxënënd

gër cale. ⁸ Damana beŋo dek, balëringdëleŋun mbaŋ andewën rewën aŋ, gayikwa aŋana aŋ alab kë labënd beñëŋënax bendanjëm. ⁹ Mëlayarindën aye ang këno wëlayand aliyer gër bëciw bëndewën ak, xarak an ŋunëŋunand na. ¹⁰ Ala kala diyenindëlebi boŋandaw gë anjëla and yël këŋo Kaxanu, në end oyekax orexëm aŋ. Angëmëne mondako kën rind ata kën hi bër xwëtan kënëŋi banjëla band ko yëlënd Kaxanu në end oyekax orexëm. ¹¹ Ar yël këŋo eyeyan an, deyarayindëlexo bend re ko Kaxanu beŋ. Ar yël këŋo edëcara ed bela an, dëcarayindëlebi gë ojaŋ od yël këŋo Kaxanu ok. Gër end ex yo, cëkwëndino Kaxanu paŋ gë Yesu Kërisët, mëŋ ar gë enjaran do gë panga ind din ir din an. Amen!

End toro eŋ

¹² Wën bëmaÿe bënd ke balënd mbaŋ bëŋo, ga kën sorond ako, atëy añëkaxik ex, këreŋun caranënd na nangëde ax ñap ex na fo. ¹³ Ecëñëxët, nëngandërayindëleŋun ga kën sorond, ang soro ko Kërisët ak. Mondako ÿapëk ex gi eŋun nëngandëraxënëd nëmëc yatir ko nëcëtëgu dek enjaran endexëm eŋ. ¹⁴ Ado enun cirërand në end oŋac or Kërisët nëngandërayindëleŋun, gayikwa Angoc and gë enjaran aŋ, and Kaxanu aŋ, gër ola orewën hi ko! ¹⁵ Barikan wën, gabatak kërexo torond na në end ga laŋ këŋo ala, në end ga rekara ko, në end ga wëndëra ko ba në end ga lil këŋi bela gër bendebën. ¹⁶ Angëmëne ga hi ko këreceŋ ko soroxënënd, cëkwayindëleŋo Kaxanu në end oŋac olo, këreŋo cëfënanënd na. ¹⁷ Gayikwa

anëka ñatëguk kiti ind kë ÿana gër ekun ed Kaxanu in. Xarak angëmëne gër ndebi kë ÿanand kiti in, mondake kë ñata gër bër ñëpëk eni kwëta Atëfëtan and Kaxanu bën? ¹⁸ Ang rek Oñëgw Omënëk ak: «Angëmëne alak lakëk exo pexaxën ar ênenene an, mondake cëñ kë hi end asëmbak eñ, do gë end awendëran eñ?» ¹⁹ Awa bër kë sorond gër edi ed benjekax gayik Kaxanu ÿandi këño ebi gi mondako bën, tebayalexëni gër otaxan odexëm, mëñ ar ex mokwëta an.

5

End emëlayan ed okëreceñ eñ

¹ Awa bëlëngw bër ex mërëxand irewën bën ÿandi ke mëni pelëra gëregako. Wëno dëñ alëngw hi këme ang bën ak, sede ir toro ind Kërisët hi keme, do bëte ahixeli këme hixeli gër enjaran endexëm and ko êanayawëgu añ. ² Kadacindënëbi ênenene bër gër amara and xwëtënan këñun Kaxanu bën. Nëkonayindënëbi gë emëkw el dek ang ñan ko Kaxanu ak, xarak ax gi ex na në end acosa fo, bëte ax gi ex na ga kënun nëyalind. ³ Ola orewën ol gilex or këni xor eni tëfëtelind bër gër amara bën. Kërenëbi bëñand na nangëde wën xwën këbi fo. ⁴ Do and ko êanayaw alëngw ar bëxadac añ, așos këñun șos gë ekamote ed owun ed gë enjaran ed din ir din el.

⁵ Bëte ocambenjar ok gë odënañ ok, baxëtindënëbi bëlëngw bën. Banayindën

☆ **4:18** 4.18 Andorenik 11.31

gër banëkëra bandewën, gayikwa are rek gër
Oñëgw Omënëk:

«Kaxanu ayël këbi yëlënd oyekax orexëm ol bër
kë banand bën,
barikan awëreli këbi wërelind bër kë rafënan
bën».

⁶ Awa wën banayindën gër lëngw ir Kaxanu,
mëj ar gë panga an, eñun dafëanaxën and këjo
ñatan añ. ⁷ Kwëtinayindën gër ndexëm dek
bebër këjun sibënënd gër banjëlan bandewën
bën, gayikwa mëj afëyëpëy këjun fëyëpëyënd.

⁸ Giyin gë anjus, këren nambinand na.
Şabucara in, arangoyëra ar gë wën an cëj,
abëtëra këjun bëtarand ga ko şaland noyö këjo
yamb ang yërañ ir këjo sisand emacar end këjo
yamb fo. ⁹ Njëpindën endexëm eñ do kemënayin
gër ekwëta ga nang kën ako mëne oyot od obat
këjun wëcanënd gë bëmaÿe bëndewën bënd
gër ngwën ro bëj. ¹⁰ And kën soro imëd añ,
Kaxanu mëj ar gë oyekax an, mëj ar waceli
këjun enjaran end din ir din end ex gër Yesu
Kërisët eñ, axanin këjun xanin, abaşën këjun
abaşën ojaŵ ok do axemën këjun xemën en
gixën bër rëd këbi aye. ¹¹ Mëj ga xwënëk wa
owun ol din ir din! Amen!

Epelar el

¹² Silas, imaÿe ind xwëta këmo gër Axwën
iñ, rëca ke mun ñëgwënëli bëpënëfëne bejo.
Añandi ÿandi ke me deya oyekax or ðal or
Kaxanu ol, mun kemëanaxën, awa kemënayin
mban! ¹³ Bërëwäk bër hik gër Babilon bën,

✧ 5:5 5.5 Andorenik 3.34

bër yata këbi Kaxanu ang wën ak bën, këjun
şemand. Aşema këjun şemand bête asëñiwën
Marëk.

¹⁴Cëmarëxën momegar ang bëmaÿe bënd këbi
balërënd fo. Awa wën ðek bër xwën këjun
Kërisët bën, cotin obetak ol.

Oniyan
Oniyan: Oniyan (New Testament+)

copyright © 2017 Wycliffe Bible Translators, Inc.

Language: (Oniyan)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

8b7902f3-5e35-5b89-86b2-c6da1be458b9